

# SOLENITÂT DI DUCJ I SANTS

Al Prin di Novembar dal 2017

*La sapience de glesie e e à peât cheste solenitât di ducj i sants a la memorie dai nestris defonts, cuasi par dînus: prime di lâ tal cimitieri a viodi dai tiei muarts, fermiti un moment a cjâlâ i sants. Parcè che te fieste dai sants e cjape la sô vere lûs la zornade dai muarts.*

*Capît chest, o podìn domandâsi: cualis jerino lis personis santis dai timps di Gjesù? Alore nus vegnin in cûr Marie la mame di Gjesù, Josef, Elisabete, Zacarie, i sants Inocents e chei oms e feminis che Gjesù al laude une vore come il centurion (Lc 7, 1-10), la vedue dal templi (Lc 21, 1-4), i pescjadôrs Simon, Andree, Jacum e Zuan (Mt 4, 18-21), il dissepul che Gjesù i voleve ben (Zn 19, 25-27)..., dutis personis santis te normalitât de vite di ogni dì.*

*Se la santitât si le cjate te normalitât de vite, alore ancje tai nestris paîs e sarà vivude une femine che e à vût il fî muart come la Madone, un om di fede come il centurion cuntun malât in cjase, una vedue che no rivave a lâ indenant, un muradôr, un frut, un zovin, personis che il paîs al ricuarde parcè che a jerin puars tal spirt, bogns, monts di cûr, int di pàs.*

*A son i nestris sants: cu la lôr vite a àn rindût plui vivibil il paîs, a àn sparniçât chel amôr che al ven dal Signôr e che al devente grazie e benedizion par ducj.*

*Lôr, cuant che a jerin fra di nô, a àn praticât lis beatitudinis di Crist (vanzeli) e cumò a son te glorie di Diu (prime leture), diventâts pardabon fis di Diu, sul stamp di Diu e lu viodin come ch' al è (seconde leture).*

*Lassinsi duncje guidâ de liturgjie e Gjoldìn ducj intal Signôr, celebrant la zornade di fieste in onôr di ducj i Sants.*

## Antifone di jentrade

Gjoldìn ducj intal Signôr, celebrant la zornade di fieste in onôr di ducj i Sants: de lôr solenitât a gjoldin i Agnui e a laudin il Fi di Diu.

Si dîs Glorie a Diu.

## Colete

Diu onipotent e eterni,  
che tu nus dâs di podê celebrâ intune sole volte  
i merits di ducj i tiei Sants,  
pai tancj ch'a prein par nô,  
danus cun bondance la tô misericordie tant suspirade.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

## PRIME LETURE

Ap 7,2-4.9-14

O viodei un stragjo di int, tante che nissun nol rivave a contâle, di ogni gjernazie e tribù e popul e lenghe.

*Cheste leture e aparten a un libri de Bibie cjariât di simbui, di numars, di colôrs che a disin midiant de imagjine ce che la reson no rivarès a spiegâ. Di fat il misteri di Diu al supare la reson come che le supare un cîl puntinât di stelis. Duncje culi al tocjarès fermâsi toc par toc, verset dopo verset.*

*A noaltris nus baste vuê savê che te glorie di Diu a son int di ogni gjernazie e tribù e popul e lenghe e duncje e je sperance ancje pai nestris defonts, lôr che plui di cualchidun a son passâts pe grande tribulazion e a an lavâts e fats diventâ cjandits i lôr vistîts cul sanc dal Agnel.*

**Dal libri de Apocalis di san Zuan apuestul**

Jo, Zuan, o viodei un agnul ch'al leve sù de jevade e al veve il sigjîl dal Diu vîf. E ur berlave a grande vôs ai cuatri agnui che ur jere stât dât il podê di fiscâ la tiere e il mâr: «No stait a fiscâ ni la tiere ni il mâr ni lis plantis fintremai che no varin marcât il sigjîl dal nestri Diu sul cerneli dai siei servidôrs». Po dopo o sintii il numar di chei ch'a jerin stâts marcâts cul sigjîl: cent e cuarantecuatrimil, marcâts di ogni tribù dai fis di Israel.

Po dopo al comparî un stragjo di int, tante che nissun nol rivave a contâle, di ogni gjernazie e tribù e popul e lenghe. A stavin ducj in pîts denant de sente e denant dal Agnel, vistûts a blanc e cu lis palmis tes mans. E a berlavin a grande vôs:

«La salvece e je dal nestri Diu sentât su la sente e dal Agnel!».

Alore ducj i agnui ch'a jerin di ca e di là de sente e i viêi e i cuatri nemâi si butarin in zenoglon cu la muse par tiere denant de sente e a laudarin Diu disint: «Amen! Laut, glorie, sapience, agrât, onôr, potence e fuarce al nestri Diu tai secui dai secui. Amen».

Alore un dai viêi si voltà viers di me e mi disè: «Chei vistûts a blanc cui sono e dontri vegnino?». I rispundeî: «Paron, tu lu sâs tu». E lui: «A son chei ch'a son passâts pe grande tribulazion e a an lavâts e fats diventâ cjandits i lôr vistûts cul sanc dal Agnel».

Peraule di Diu.

## SALM RESPONSORIÂL

dal Salm 23

*La nestre societât e cjacare tant pôc di monts di cur parcè che il jessi monts di cur al compuarte jentrâ tal profont di nô, lâ cuintri se stes, purificâsi, convertîsi e sfuarçâsi di cambiâ vite rinunçant a lis idolatriis dal mont. Ma si domande il salmist: Cui puedial lâ sù su la mont dal Signôr? E la rispueste e je: Chel ch'al à cûr mont. Par chest il ritornel dal salm al dîs:*

### **R. Furtunâts i monts di cûr, parcè che a viodaran Diu.**

*Se cjantât: Il cjant dai salms responsoriâi, p. 284.*

Dal Signôr e je la tiere cun dut ce ch'al è dentri,  
il mont cun dut ce ch'al baline,  
parcè che su lis aghis lui le à fondade  
e su lis corints des aghis le à saldade. **R.**

Cui puedial lâ sù su la mont dal Signôr?  
Cui puedial restâ te sô cjase sante?  
Chel ch'al à cûr mont e mans nocentis,  
che no si piert daûr di ce che nol à tignince  
e che par ingjanâ nol zure. **R.**

Chest al varà la benedizion dal Signôr  
e justizie dal Diu che lu salve.  
Cheste e je la gjernazie di chei che lu cirin,  
che dal Diu di Jacop a bramin la muse. **R.**

## SECONDE LETURE

1 Zn 3,1-3

**O viodarî Diu come ch'al è.**

Nô o sin za di cumò fis di Diu, *parcè che si lei te Apocalis*: Ve: jo o stoi a la puarte e o tuchi. Se un al scolte la mê vôs e mi vierç la puarte, o jentrarai li di lui, o cenarai cun lui e lui cun me (3, 20). *E al zonte il Signôr te ultime cene*: Se un mi ûl ben, al metarà in pratiche la mê peraule, e gno Pari i volarà ben e o vignarî di lui e o larî a stâ li di lui (Zn 14, 23). *Il Signôr al cîr ognun di nô come che un pari al cîr il propri fî; di fat no si è ancjemò pandût ce ch'ò sarî. Nus sucedarà in chê di ce che Gjesù i à dit a Natanael*: Tu viodarâs robis ben plui grandis! (cf. Zn 1, 50).

## De prime letare di san Zuan apuestul

Miei cjârs, viodêt ce sorte di amôr che nus à dât il Pari: di jessi clamâts fis di Diu, e lu sin pardabon! Se il mont no nus cognòs al è parcè che nol à cognossût lui. Miei cjârs, nô o sin za di cumò fis di Diu, ma no si è ancjemò pandût ce ch'ò sarin. O savìn però che cuant che lui si sarà pandût, nô o sarin sul so stamp, parcè che lu viodarìn come ch'al è.

Chel ch'al à cheste sperance in lui, al cîr di smondeâsi come ch'al è mont lui.

Peraule di Diu.

**CJANT AL VANZELI**

**Mt 11,28**

**R. Aleluia, aleluia.**

Vignît di me, ducj vualtris ch'ò sês stracs e masse cjamâts,  
e jo us fasarai polsâ, al dîs il Signôr.

**R. Aleluia.**

**VANZELI**

**5,1-12**

**Stait contents e gjoldê, parcè che grande e je la vuestre ricompense tai cîi.**

*Lis grandis realtâts de vite cuasi cuasi nancje no si lis cîr: a vignaran dibessolis. Cussì al è ancje des beatitudinis che miârs e miârs di libris grancj e piçui a àn cirût di spiegâ ma no spieghin, parcè che chestis beatitudinis a puedin nassi, come l'amôr, dome dal di dentri, dal nestri cûr.*

*Lis beatitudinis a son di lei, di rifleti sore, di meti in pratiche cun fadie, sielzint. E dopo fat chest, tocje tornâ a lei, tornâ a rifleti sore, tornâ a meti in pratiche cun fadie... e cussì par dute la vite.*

*I sants e i puars a son i specialiscj des beatitudinis; i prins lis àn mastiadis e metudis come fonde de lôr vite; i seconts lis àn metudis in pratiche cun tante fede, cence savê. I sants dai nestris paîs a apartegnin a la seconde categorie. Ancje lôr, midiant des beatitudinis, a son diventâts come i sants dai altârs: sâl de tiere e lûs dal mont (cf. Mt 5, 13-16).*

*E lant tal cimiteri, cjalant certis fotografîs o nons, faint memorie, o podìn ben dî: Benedete la teire che o fasês. Amen.*

## Dal vanzeli seont Matieu

In chê volte, viodint lis folis, Gjesù al le su la mont e, a pene sentât, i lerin dongje i siei dissepui.

Alore al vierzè la bocje par inscuelâju disint:

«Furtunâts i puars tal spirt,

parcè che il ream dai cîi al è lôr.

Furtunâts chei ch'a vain,

parcè che a saran consolâts.

Furtunâts chei che a son bogns di cûr,

parcè che a ereditaran la tiere.

Furtunâts chei ch'a an fan e sêt de justizie,

parcè che a saran saciâts.

Furtunâts chei ch'a an misericordie,

parcè che a cjataran misericordie.

Furtunâts i monts di cûr,

parcè che a viodaran Diu.

Furtunâts chei che a lavorin pe pâs,

parcè che ur disaran fis di Diu.

Furtunâts chei che a son perseguitâts par colpe de justizie,

parcè che il ream dai cîi al è lôr.

Furtunâts vualtris cuant che us svilanaran e us perseguitaran e, cu la falsetât, a disaran cuintri di vualtris ogni sorte di mâl par colpe mê. Stait contents e gjoldêt, parcè che grande e je la vuestre ricompense tai cîi».

Peraule dal Signôr.

**Si dîs** O crôt.

### **Su lis ufiertis**

Ve agrât, Signôr, i regâi  
che ti presentin in onôr di ducj i Sants  
e danus di sintî che i tegnin a la nestre salvece  
chei che ju crodin za sigûrs de lôr immortalitât.  
Par Crist nestri Signôr.

### **Antifone a la comunion**

**Mt 5, 8-10**

Furtunâts i monts di cûr, parcè che a viodaran Diu.  
Furtunâts chei ch'a lavorin pe pâs, parcè che ur disaran fis di Diu.  
Furtunâts chei ch'a son perseguitâts par colpe de justizie,  
parcè che il ream dai cîi al è lôr.

### **Daspò de comunion**

Adorant, Signôr, il sflandôr che tu palesis,  
tu l'unic Sant in ducj i tiei Sants,  
o domandin la tô grazie  
par che, colmant la nestre santificazion cu la plenece dal to boncûr,  
o podin passâ di cheste taule di pelegriins  
al gustâ de patrie dal cîl.  
Par Crist nestri Signôr.

\* \* \*

### **Cjants:**

La fuarce dal Pari, *n. 207*;  
Contait la buine gnove, *n. 66*;  
No sta vê pôre, *n. 91*;  
A son oms che no àn nuie, *n. 94*;  
Litaniis dai Sants, *n. 178*.

**Cjantade:** Magnificat, *n. 291*;  
La mê anime *n. 294*;

**Salm:** Laudait fameis dal Signôr, *n. 264*.

\* \* \*

*La glesie e je glesie dai puars tal spirt  
e dai pecjadôrs che a van cirint perdon;  
no je dome chê dai juscj e dai sants;  
anzit e je la glesie dai juscj e dai sants  
cuant che chescj a san di sedi puars e pecjadôrs.*

*Pape Francesc*

\* \* \*

- \* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- \* *Il cjant dai salms resposoriâi, Ed. Glesie Furlane, 2012.*
- \* *50 corâi de cristianitât todescje voltâts par furlan, ed. Glesie Furlane, 2016.*
- \* *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*
- \* *Par domandâ chescj libris scrivêt a [info@glesiefurlane.org](mailto:info@glesiefurlane.org)*